


EKALESIA FAAPOTOPOTOGA KERISIANO I AMERIKA SAMOA

OFISA O A'OA'OGA KERISIANO



VASEGA FEOLOLO



FEPUARI - IUNI

2023

FA'ASOLOGA O MATAUPU VASEGA FEOLOLO

<u>ASO</u>	<u>MATAUPU</u>	<u>TUSI FAITAU</u>
1. Fepuari 05, 2023	Ia pipi'i i le Alii	Iakopo 1:12-15
2. Fepuari 12, 2023	O le avea ma ta'ita'i lelei	1Peteru 5:1-11
3. Fepuari 19, 2023	O le poloaiga a Iesu	Mataio 28:16-20
4. Fepuari 26, 2023	SUEGA MUAMUA	
5. Mati 05, 2023	Fa'amaoni i le aoga e te manuia ai	Mataio 25:14-30
6. Mati 12, 2023	O Mose le auauna fa'amaoni	Numera 12:1-16
7. Mati 19, 2023	E fesoasoani mai le Alii ia'i tatou	1Samuelu 7:7-14
8. Mati 26, 2023	SUEGA LONA LUA	
9. Aperila 02, 2023	Ua malaga Iesu i Ierusalem (Aso Sa Laupama)	Mareko 11;1-10
10. Aperila 09, 2023	E le o i'inei o Ia (Aso Sa o le Eseta)	Mataio 28:1-10
11. Aperila 16, 2023 6:1-9	A'oa'o ma faia e manuia ai	Teuteronome
12. Aperila 23, 2023	Vaai ma fa'atuatua i le talalelei	Galuega 13:4-12
13. Aperila 30, 2023	SUEGA LONA TOLU	
14. Me 07, 2023	Filifili I le lelei ae le o le leaga (Aso Sa o Tina)	Iosua 24:14-18
15. Me 14, 2023	E viia le Tina amio lelei	Fa'ataoto 31:10-12, 26-31
16. Me 21, 2023	E sili le taulaga pe sili le alofa	Mataio 9:9-13
17. Me 28, 2023	(Penetekoso) O Iesu le ala i le Tama	Ioane 14:1-17
18. Iuni 04, 2023 35	Ua te'ena e le Alii le ala o Pala'amo	Numera 22:15-
19. Iuni 11, 2023 11	O le pepelo o Anania ma Safaira	Galuega 5:1-
20. Iuni 18, 2023	O ala o le Tama fai aiga lelei (Aso Sa o Tama)	Kenese 13:1-18
21. Iuni 25, 2023	SUEGA MULIMULI O LE AFA TAUSAGA	

MANUIA TELE LE TU'UAGA, TATOOU TOE FEILOA'I!

VASEGA FEOLOLO – 2023, FEPUARI – IUNI

ASO SA FEPUARI 05, 2023

MATAUPU 01: “IA PIP'I I LE ALII”

TUSI FAITAU: Iakopo 1: 12-15

SINI: Ia malamalama tamaiti, o le pip'i i le Alii, e lavatia ai puapuaga o le ola.

FESOASOANI MO FAIAOGA:

E fa'atalofa ma fa'afeiloa'i atu foi i lo outou paia ma lo outou mamalu o le vasega o Faiaoga Aso Sa i le amataga o tiute fa'a-faiaoga Aso Sa o lenei foi tausaga ua tatou aulia mai i le alofa ma le agalelei o le Atua. Talitonu ua maua se malosi fa'asili mai le malologa sa feagai ai i le fa'ai'uga o le la tausaga, aemaise foi o le amataga o lenei tausaga. Ia ae saga'i ane loa aua le fa'atinoina o galuega tau amata o lenei foi tausaga. E ao lava ona fa'amanatu pea i le fanau le taua o le api ma le peni e fa'aoga i le taimi o tatou mataupu, ma ia tautuana ia lava le lua mafutaga ma le tusi faitau ua tu'uina atu e faigofie ai lau galuega i le Aso Sa.

FESOASOANI MO LE MATAUPU:

O le lalolagi lenei tatou te iai, o lo'o tatou ola nei i se olaga o fete'enai'ga o mea lelei ma mea leaga. O le olaga o mea e tataua ona tatou faia tatou te maua ai lo tatou Alii o Iesu, a ua tele ina fa'alavelaveina i tatou e le tiapolo ia po'o Satani foi. O le mea lea e taua tele ai le fa'amanatu mai a Iakopo i lana tusi sa tatou faitauina i lenei taeao, e uiga lea i le tulaga tau i fa'aosoosoga atoa ai ma le tulaga e ta'u o le tofotofoina o le tagata.

O lea lava o lo'o manino mai i le tatou tusi faitau, e le fa'aosoosoina se tasi e le Atua e fai se mea leaga. Peita'i o le mea mautinoa, e fa'aosoosoina le tagata e Satani, ona ua tosina lona loto i le tu'inaanau. Lea e fai mai ai le fuaiupu e 15: 'Pe a to le tu'inaanau ona fanau mai ai lea o le agasala, a matua le agasala, ona fanau mai ai lea o le oti.'

O mea lava ia e lua, e tele ina fefinaua'i i taimi ma aso uma o lo tatou ola. O le fa'aosoosoga mai le tiapolo ina ia fai le leaga, ma le onosa'i i le tu'inaanau leaga e i'u ai i le agasala ma le oti. Peita'i, o le tagata lava e tumau ma pip'i i le Alii, e lagona e ia le alofa moni i le Alii, e mautinoa e le mafai ona sese pe pa'u atu i le fa'aosoosoga a le fili ma le tiapolo. O le tagata e sao mai i ia fa'aosoosoga uma, o ia foi lava lea ua ta'ua ua manumalo i tofotofoga. A'o lea ua ta'ua mai e Iakopo, o le tagata ua manumalo i le tofotofoga, e maua e ia le pale o le ola.

Ioe tamaiti, o le pip'i i le Alii, tatou te manumalo ai i mailei ma fa'aosoosoga leaga a le tiapolo, e taumafai e fa'aleaga i tatou. Aua ne'i tu'inaanau gofie i tatou i mea leaga o lenei lalolagi. Aua a to le tu'inaanau ona fanau mai ai lea o le agasala, a matua le agasala ona fanau mai ai lea o le oti. Ae a pip'i pea tatou i le Alii e ala i le tatalo, ma toaga i le lotu, aoga Aso Sa, usita'i i matua, fa'aaloalo i so'o se tagata, e manumalo foi i tatou i tofotofoga uma ma maua ai e'i tatou le pale matagofie o le ola e fa'avavau, ua folafola ma saunia e le Alii mo'i tatou o lana fanau.

A'OA'OGA:

1. Ia fa'alagolago i le Alii i so'o se mea e te manatu iai.
2. Aua le fa'amoemoe i lou lava atamai.
3. O Iesu le pogai ma le puna o manuia mo lo tatou ola.

GALUEGA FA'ATINO: Upu ma o latou uiga

1. onosa'i - fa'apalepale
2. fa'aosoosoga - manaoga po'o tu'inaanau le lelei
3. tofotofoina - su'esu'e

PESE: Ou te tumau ma pipi'i mau
Ou te tu mau ma pipi'imau
Le lalolagi taumafai e liliu ese a'u
Ou te tumau ma pipi'imau.

Fa'amalo mo le galuega o lenei Aso Sa, ia saunia e le Faiaoga le tatalo e fa'ai'u ai le vasega.

IA MANUIA TELE LE ASO SA!!

ASO SA FEPUARI 12, 2023

MATAUPU 02: "O LE AVEA MA TA'ITA'I LELEI"

TUSI FAITAU: 1Peteru 5:1-11

SINI: Ia malamalama le vasega, o le galuega fa'a-ta'ita'i, e tatau ona faia i le fa'amaoni ma le alofa.

FESOASOANI MO FAIAOGA:

Malo folau fa'afetai le pale i o outou faiva alofilima i lea aso ma lea aso. Talitonu le manatu o lo'o tumua'i tutusa i tatou i le tausiga alofa a le Atua i lo outou soifua ma lo tatou ola. O le tatou mataupu, o lo'o fa'amamafa le tulaga fa'a-ta'ita'i e pei foi o le Faiaoga Aso Sa, le taua o le fa'amaoni. O le mea lea, ia fa'amaoni ona e mafuta i le tusi faitau o le tatou mataupu ua tu'uina atu. Ia manuia tele le tapenaga.

FESOASOANI MO LE MATAUPU:

O le avea ma ta'ita'i, o le tagata lea ua ave uma iai le fa'atuatuaga o so'o se fa'alapotopotoga e pei o aiga, nu'u, o le atunu'u ma le Ekalesia. E mafai foi ona ta'ua tagata matutua e pei o toea'i'ina ma lo'omatutua o ta'ita'i, aua o latou ia o lo'o iai le tofa ma le moe latou te ta'ita'ia ai so'o se fa'alapotopotoga. O i latou foi ia e sau ai fa'atonuga ma fautuaga lelei e manuia ai so'o se fa'amoemoe.

E fa'apea foi se lagona o Peteru o lo'o fa'ailoa mai i le tusi faitau o le tatou mataupu i lenei taeao. O le tusi e ave i toea'i'ina po'o Tama o le Ekalesia i le vaitau tonu lea na fa'ataapeapeina ai le au Kerisiano i nu'u ese'ese o le lalolagi (Diaspora) aemaise i Asia itiiti, ona o sauaga mamafa a le malo o Roma.

Ta'ua e Peteru, e tatau i e o le a ave ma ta'ita'i ona taulamua i fa'ata'ita'iga lelei uma, ina ia mulimulita'i iai tagata ua i lalo o a latou ta'ita'iga. Na fa'amanatu e Peteru ia tausia lelei le lafu mamoe ma le loto maualalo fa'atasi ai ma le alofa. Ia aua ne'i faia ma le fia fai oloa, ae ia onosa'i i mea faigata e tutupu i luga o le galuega. E ao foi ona lagonaina e i latou o e talavou, ona usiusita'i i ta'ita'i ina ia sologa manuia itu uma o le galuega a le Atua.

Ia manatua, ia faia le galuega o le ta'ita'i ia tusa ma le finagalo o le Atua. Ia fa'amuamua le vaai i le manuia lautele o tagata, ae le o le vaai muamua i le manuia o le ta'ita'i. Ia iloa ona fai ma auauna i tagata i so'o se itu. Ia naunau i mea e avatu mo e mafatia, ae le o mea e maua mai mo ia lava ma lona lelei. O nisi ia o itu e ao ona maua e i latou uma pe a o'o ina tofia ma ave i latou ma ta'ita'i i le lumana'i. Ia faia mea uma e tusa ai ma le finagalo o le Atua. Ia maua e i tatou le alofa, agamalu, fefa'apalepalea'i, felagolagoma'i, fa'amaoni, atoa ai ma le onosa'i. Ona sologa manuia ai lea o mea uma, aemaise le galuega a le Atua.

A'OA'OGA:

1. Ia fai le galuega fa'a-ta'ita'i i le loto maualalo ma le alofa.
2. O Iesu lo tatou ta'ita'i sili.
3. O le ta'ita'i lelei, e ofoina atu lona tagata atoa e auauna ai mo tagata lautele.

GALUEGA FA'ATINO:

Tu'u le avanoa i tamaiti, e fa'aali mai ai ni o latou manatu po'o a uiga o upu ua tu'uina atu i lalo.

1. leoleo mamoe, 2. fa'autauta, 3. alofa tunoa, 4. fa'amauaialuga

UIGA O UPU:

aioi - ole, tatalo atu
fa'atauanauina - fai fa'amalosi (do it by force)
fa'aa'oa'o - fai ma fa'ata'ita'iga, taulamua
mana - malosiaga fa'a-le'Agaga

PESE: Ua ou filifili e mulimuli ia Iesu
Ua ou filifili, e mulimuli ia Iesu
Ou te le toe foi, ou te le toe foi.

TATALO: Fa'afetai le Atua i lau ta'ita'iga mana ia te'i matou, ua mafai ai ona fa'ataunu'u mea uma matou te faia e tusa ma lou finagalo. Ua matou tatalo i lau afio, ia e foa'i mai le mafaufau lelei ina ia matou usiusita'i ai i o matou matua ma e ua avea ma ta'ita'i, fesoasoani mai lou Agaga e fa'amalosi i lo matou vaivai. Ona o Iesu...AMENE.

IA MANUIA LE ASO SA!!

ASO SA FEPUARI 19, 2023

MATAUPU 03: "O LE POLOAIGA A IESU"

TUSI FAITAU: Mataio 28: 16-20

SINI: Ia malamalama le vasega, ma ia fiafia e fa'alogo ma tausisi i poloaiga mai le Alii.

FESOASOANI MO FAIAOGA:

Ia i le Atua poto le vi'iga nei e o'o i le fa'avavau, talitonu lava o lo'o tumua'i tutusa i tatou i le alofa tausii mai o le Atua. O le isi poloaiga sili a Iesu, ia tatou fa'amaoni e saili'ili ma su'esu'e le tusi faitau. Ia manuia le tapenaga.

SINA FA'ASOA MO LE MATAUPU:

O le poloaiga tamaiti, o se fa'atonuga po'o se feau ua tu'uina mai, ia pe ua poloa'iina ai foi tatou e ao ona tatou fa'atinoina. E tele ma anoanoa'i feau ese'ese i totonu o tatou aiga atoa ai ma fa'atonuga a o tatou matua, fa'atasi ai ma o tatou faiaoga e fai mai pea i a'i tatou i le tele o aso, ae peita'i, o le poloaiga lea e pei ona sa tatou faitau iai, o se poloaiga taua tele lea aua o le poloaiga mai lo tatou Alii o Iesu a'o le'i afio o Ia i le lagi.

O le poloaiga a Iesu i ona so'o, ina ia latou o atu e fai nu'u uma lava ma so'o. Ia papatiso atu i latou i le suafa o le Tama, le Atalii, ma le Agaga Paia. Ia a'oa'o atu ia te'i latou, ia tausii i mea uma e pei ona ia a'oa'o atu ai ia te'i latou. Fa'auta foi, e iai pea o Ia fa'atasi ma i latou sei'a o'o i le gata'aga o le lalolagi. O le tasi lea poloaiga sili ma le taua a lo tatou Alii ua ia fetalai ai i ona so'o ina ia o latou o e fa'ataunu'u.

Ae o le mea ua mautinoa tamaiti, o tatou foi o isi so'o, aua o lea ua tatou filifilia Iesu e fai ma Alii ma Fa'aola i o tatou olaga. E ui la ina le mafai ona tatou papatisoina tagata, ae e iai a le taimi e avea ai nisi o'i tatou ma Faifeau, pe a o'o ina matutua i tatou, ona mafai lea ona tatou faia lea vavega. Peita'i, o le tatou faia ma le usitai'a o le finagalo o le Atua, e iai i lo tatou fa'alogo, usiusita'i, loto alofa, loto fesoasoani, loto fa'amagalo, ma fa'atupu le filemu, o le fa'aailoga lava lea o lo tatou usitai'a o ana poloaiga.

Manatua ua fetalai Iesu e iai pea o Ia ma i tatou i taimi uma sei'a o'o i le gata'aga o le lalolagi. O Ia na te tausii ma laveaiina i tatou ma fa'amanuia i tatou i so'o se mea tatou te fia maua ai se fesoasoani, e ala i lo tatou ola su'esu'e, sailiili, galulue, ma tatalo pea i le Atua i so'o se mea tatou te mana'omia i aso uma e le aunoa.

A'OA'OGA:

1. Ia usita'i i poloaiga a le Alii e manuia ai.
2. Ia fai i tatou ma fa'ata'ita'iga i nisi i ala o le Alii.
3. Taulamua i le fai meatonu ma le amio lelei.

GALUEGA FA'ATINO: saili uiga o upu nei

1. masalosalo - le talitonu, le mautonu, le iloa tonu pe sa'o pe sese.
2. Papatiso - fa'atinoga o le sauniga Paia mo le fa'apaiaina ia avea ma tagata o le aiga Paia o le Atua
3. Gata'aga - muta'aga, i'uga

Fa'afetai mo le galuega o lenei Aso Sa, ia saili se pese ma fai se tatalo e fa'ai'u ai le vasega.

IA MANUIA TELE LE ASO SA!!

ASO SA FEPUARI 26, 2023

MATAUPU 04: "SUEGA MUAMUA"

TUSI FAITAU: Iakopo 1:12-15, 1Peteru 5:1-11, Mataio 28:16-20

SINI: O le toe fa'amanatu lea i mafaufau o le fanau, ina ia manatua pea ma taofi mau mataupu po'o tala mai le Tusi Paia o lo'o a'oa'oina ai i latou.

FESOASOANI MO FAIAOGA:

Ua tatou o'o mai i le Aso Sa mulimuli o lenei foi Masina, malo le galulue fa'afetai le onosa'i. O le tu'ualalo lava ina ia fa'amaoni pea ona fa'ataunu'u a tatou suega o Masina ta'itasi. Ae taoto atu lava i faiaoga Aso Sa mo lona fa'atinoina i le faiga e fai ai le suega, a'o le fa'amoemoe mauuluga, ia su'esu'eina pea mafaufau o le fanau. Ia manuia tele le tapenaga.

Tali mai fesili nei e tusa ma mataupu ua uma ona tatou talanoaina.

1. O le a le mea e ala ai ona fa'aosoosoina le tagata?
Tali: Ona ua tosina lona loto i tu'inaanau.
2. O le a se mea tatou te faia tatou te manumalo ai i Fa'aosoosoga ma tofotofoga o le nei olaga?
Tali: Ia pipi'i i le Alii e ala i le tatalo.
3. Pe a to le tu'inaanau, ona fanau mai ai lea o le agasala, _____.
(fa'auma mai le fuai tau lea) **Tali:** a matua le agasala, ona fanau mai ai lea o le oti
4. O le a le manatu o Peteru i a'i latou e avea ma ta'ita'i?
Tali: Ia taulamua i a'i latou ona fai o fa'ata'ita'iga lelei, ina ia mulimulita'i atu iai tagata.
5. O ai lea sa ave iai le tusi a Peteru?
Tali: O toea'ina po'o Tama o le Ekalesia.
6. O ai le pulega malo i le vaiata lea na tusi ai Peteru?
Tali: O le malo o Roma
7. O le a le poloaiga a Iesu i ona so'o i le mataupu sa talanoaina?
Tali: Ia latou o atu e fai nu'u uma lava ma so'o, ma papatiso atu i le Suafa o le Tama, le Atalii, ma le Agaga Paia.
8. O le a le isi poloaiga taua a Iesu o lo'o ta'ua i le tala?
Tali: 'Ou te ia te outou i aso uma lava sei'a o'o i le gata'aga o le lalolagi.
9. O a ni a'oa'oga taua sa e maua mai i mataupu sa fa'amatalaina i lenei Masina? (tu'u le avanoa le vasega e tai mai ae siaki e le Faiaoga ma togi)

Malo lava le pale, fa'afetai foi i le fa'atinoina o faiva ma tiute sa feagai ma outou i lenei Masina, fa'afetai i le Atua i lana tausiga ma lana puipuiga malu i lo outou soifua ma lo tatou ola. Ia agalelei

pea le Atua, maua lo outou malosi aua lo outou valaauina i so'o se tiute. Ia sailise pese ma fai le tatalo e fa'ai'u ai le vasega.

IA MANUIA LE ASO SA!!

ASO SA MATI 05, 2023

MATAUPU 05: "FA'AMAONI I LE A'OGA E TE MANUIA AI"

TUSI FAITAU: Mataio 25: 14-30

SINI: Ia a'oa'oina le fanau, aua le fa'atamala i le a'oga a 'ia toaga e su'esu'e ma fa'amaoni i le faiga o meaaoga ona manuia ai lea i le lumana'i.

FESOASOANI MO FAIAOGA:

Fa'afetai i le Atua i lana tausiga mana i lo outou soifua ma lo tatou ola, lea ua tatou aulia mai ai le Aso Sa muamua o lenei Masina. Fa'amalo atu lava le galulue i tiute o lo'o feagai pea ma outou, ae ao lava ona fa'amanatu atu o le atoaga lava o le fa'amatalaina o le mataupu o lo'o taoto i le tusi faitau. O le mea lea, ia faitau ina ia manino lelei iai. Ia manuia le tapenaga.

FESOASOANI MO LE MATAUPU:

O le tatou mataupu o lenei taeao, 'Fa'amaoni i le aoga e te manuia ai'. Ae o le tatou tatou tusi faitau, o le fa'ataoto a Iesu i le tagata na alu malaga ae tufa taleni i ana auauna latou te galuea'ina. O le upu taua o lo'o fia tutiluliloa o le 'Fa'amaoni', aua e ese le faigofie ona tatou tautatala ai a'o lona fa'atinoina e faigata. Ou te manatu ua lausilafia ma ua malamalama foi lenei fa'ataoto a Iesu e pei ona aumai e Mataio. Na valaau e le ta'ita'i ana auauna ma ia tu'uina atu iai taleni, e 5 le tasi, e 2 le isi, ae tasi mo le isi, ina 'ia le gata ia vaai, a 'ia galuea'ina ma le fa'amoemoe e maua mai ai se fa'asiliga, ona alu malaga loa lea o le ta'ita'i.

O le i'uga ina ua toe foi mai le ta'ita'i ma asia loa ana taleni na tu'u i ana auauna. Ua sau le na iai taleni e 5 ua fa'apea mai, lo'u matai e, e lima taleni na e tu'uina mai, lea ua ou maua ai isi taleni fa'aopoopo e 5. Ona fai atu lea o lona matai ia te ia, le auauna lelei e ma le fa'amaoni, ua e fa'amaoni i mea itiiti, ou te tofia oe e pule i mea e tele; ina ulufale mai ia i le fiafia o lou Alii. Ua fa'apenaina foi I le auauna na ave iai taleni e 2, na ia maua foi isi taleni fa'aopoopo e lua. O lona lelei foi ma lona fa'amaoni, na fa'amanuia ai lona matai ma fa'aulufale ia te ia.

A o le tasi na tu'u iai le taleni e tasi, na fa'apalapala o ia ina ua nofo ma tanu ma nan'a le taleni. Ua leai se fa'amaoni i le taleni na tu'u ia te ia. Ua manatu fa'apito mo ia lava, e le fia galue mo lana ta'ita'i. Ua ia manatu, e leai se mea o le a tigaina ai fua ia e galue, ae selesele e lona matai le manuia. O lona i'uga, na faoa le taleni ma tulia i fafo i le pouliuli, ona o le paie ma le le fa'amaoni.

Ioe tamaiti, o le ata manino foi lea o tatou e pei ona aumai e le tala, e taua lo tatou fa'amaoni. A fa'amaoni le tamaitiiti I le faiga o ana meaaoga ma to'aga e su'esu'e, e fa'atuputeleina le poto, e i'u lelei foi ma manuia lona lumana'i. Ae a paie, fa'avaivai, ma le fa'amaoni, e leai foi se tau'i lelei e maua. Ae le fa'apea la na'o le aoga e te fa'amaoni ai, leai, so'o se mea lava e te alu e fa'atino, e le gata o lou aiga, o le Aoga Aso Sa ma le Ekalesia, fa'apea foi lou nu'u.

A'OA'OGA:

1. O le fa'amaoni e maua ai mea sili ma le manuia.
2. Aua le ola paie
3. Aua le natia se taleni lelei o ia te oe
4. To'aga i le aoga e maua ai le lumana'i lelei.

GALUEGA FA'ATINO:

1. E to'afia auauna na ave iai e le ta'ita'i taleni?

Tali: E to'atolu (3)

2.O le a se tau'i na maua e auauna lelei ma fa'amaoni?

Tali: Tofia e pule i mea e tele, ulufale i le fiafia o le Alii.

3.A'o le a se tau'i na maua e le auauna leaga ma le paie?

Tali: Na faoa lana taleni, ma tulia i fafo i le pouliuli o le mea o lo'o iai le taufa'itagi aue ma le lilivau o nifo.

PESE: Fa'alogo ma usita'i e leai se isi ala

E fiafia ai Iesu pe a fa'alogo ma usita'i

Galue ma fa'amaoni, fiafia ma olioli

E te maua ai le tau'i pe a fa'alogo ma usita'i.

Fa'afetai tele mo le galuega o lenei Aso Sa, ia fa'amanuia le Atua. Ia tofi se tama e fa'ai'u le vasega i le tatalo.

IA MANUIA LE ASO SA!!

ASO SA MATI 12, 2023

MATAUPU 06: "O MOSE LE AUAUNA FA'AMAONI"

TUSI FAITAU: Numera 12: 1-16

SINI: Ia a'oa'oina pea tamaiti i le taua o le ola auauna ma galue fa'amaoni, ae fa'alagolago i le Atua e fesoasoani mai.

FESOASOANI MO FAIAOGA:

Malo lava le galulue fa'afetai foi le fa'atoatoa i feau ma galuega sa feagai ai ma outou o le vaiaso.

Talitonu lava o lo'o taoto i le agatonu mea uma e ala i le fa'atasi mai o le agaga o le Atua ia'i tatou

ta'ito'atasi. O le galuega lava ia o lona o lo'o ia te outou le fa'atinoina, ae le tu'ua ai lava le fa'amanatu atu pea, ina ia lava le taimi e fai ai lau sailiga mo le tusi faitau, aua o lo'o taoto ai le fatu o le mataupu.

FESOASOANI MO LE MATAUPU:

O lo'o tatou iai pea i le fa'agasologa o le valaauina o tagata e fai ma auauna a le Atua e pei foi o Mose lea ua aumai ai le tatou mataupu i lenei taeao. O Mose na valaauina e le Atua (Esoto 3:1-8) e alu aumai Isaraelu o lo'o nofo pologa i Aikupito. E valaauina Mose a'o galue i le leoleoina o Mamoe a le Tama o lona to'alua o Ietero lona igoa. E ui i le fefe ma le le mautonu o Mose, ae na fa'alogo lava ma usita'i Mose i lona valaauina mai le Atua. E tele vavega na faia e le Atua e ala ia Mose, ona o le auauna na filifilia e le Atua, sa fa'amaoni foi ma usita'i i le Atua.

O le tatou tusi faitau e pei ona aumai ai le tatou mataupu, fai mai ua muimui Miriama ma Arona ia Mose. O Miriama o le tuafafine o Mose, a'o Arona o le uso o Mose. O i laua nei o le Perofeta ma le Ositaulaga, o nisi ia o la tulaga maualuluga o le nu'u, e tu lata ane i le pule fa'a-ta'ita'i ia Mose. Peita'i, ua fa'ase'a Miriama ma Arona ona ua la naunau foi i le pule fa'a-ta'ita'i. Ua taumafai Miriama ma Arona e saili se auala e ta'u-leagaina ai le ta'ita'iga a Mose. Pei ona la molia ai Mose i le faia'v'a i le fafine nu'u ese, o se aga e le tatau mo le Isaraelu aua e sa i le tulafono.

Na silafia e le Atua le muimui a Miriama ma Arona. Ua foliga mai ua la fesiligia le pule ma le ta'ita'iga a le Atua lea na filifilia ai Mose e fai ma auauna e ta'ita'i Isaraelu. Aua o le Atua na valaauina Mose e ave'esea mai le nu'u i le mea sa nofo pologa ai. O le pule foi a le Atua, e le fesiligia e se tasi. Na fa'ailoa e le Atua ia Mose, Miriama, ma Arona, o le perofeta a le Alii o ia te outou, o ia lona ou te fa'ailoa ai i fa'aaliga ma miti. E pei o lana auauna o Mose na la fesaga'i ma fetautalatalaa'i. O le auauna fa'amaoni e le muimui e pei o Miriama ma Arona. Na o'o le tino ma'i ia Miriama ona o le ola tau-fa'a-leaga ma le ola muimui ia Mose. Peita'i, na alofa lava Mose i lona uso ma lona tuafafine, ma ia 'ole atu i le Atua e fa'amalolo ia Miriama. Na fa'afogaina lava e le Atua le alaga a Mose, ona o le auauna e fa'amaoni.

GALUEGA FA'ATINO: Tali i le Sa'o po'o le Sese

1. Na muimui Miriama ma Mose i le Atua ona o le fia ta'ita'i.

Tali: Sese

2. O Arona o le Ositaulaga

Tali: Sa'o

3. O Miriama o le tuafafine o Mose ma Arona.

Tali: Sa'o

4. E le'i ma'i Miriama i se ma'i lepela.

Tali: Sese

A'OA'OGA:

1. E i'u leaga le tagata muimui ma le tau fa'aleaga.
2. Aua ne'i fesiligia le finagalo o le Atua.
3. E alofagia e le Atua le tagata fa'amaoni.

PESE: Galue lou agaga ia te a'u

Galue lou agaga ia te oe

E sisi'i o'u lima, e sisiva o'u vae

Lo'u gutu ua pese i ou vi'iga, I ou vi'iga.

Fa'afetai lava mo le galuega o lenei Aso Sa, ia fa'amanuia le Atua. Ia tofi se tama'ita'i e fai le tatalo e fa'ai'u ai le vasega.

ASO SA MATI 19, 2023

MATAUPU 07: "E FESOASOANI MAI LE ALII IA'I TATOU"

TUSI FAITAU: 1Samuelu 7: 7-14

SINI: Ia malamalama tamaiti e le tu'ulafoa'ia e le Alii lana fanau, e fesoasoani mai i a'i tatou.

FESOASOANI MO FAIAOGA:

Talofa lava, fa'amalo atu foi le fa'amalolosi i o outou faiva alofilima, manatu lava o lo'o manuia outou i le alofa tausi mai o le Atua. Fa'amoemoe lava o le na lava e seki mea uma, ae taua foi le fa'amanatu pea mo e ua galo. Ia sema pea sou taimi o le vaiaso mo lau tapenaga e ala i le tatou tusi faitau ua tu'uina atu mo le mataupu, o le fesoasoani tele lava lena mo oe ma lau tapenaga. Ia manuia lau sailiiliga.

SINA FA'ASOA MO LE MATAUPU:

Ina ua logotala ma iloa e alii o Filisitia ua fa'apotopoto e Samuelu tagata Isaraelu uma i Mesepa, ona latou taupulepule lea o se osofa'iga e tau ma Isaraelu. Na fa'alogo iai Isaraelu ua fofou mai Filisitia e tau le taua ma i latou. Na tupu ifo ia Isaraelu lagona o le fefe ma le le mautonu ona o le mata'utia o Filisitia. Sa augani le fanauga a Isaraelu ia Samuelu, ina ia valaau ma ole atu i le Atua e lavea'i, fesoasoani, ma fa'aola mai i latou mai lima sau o Filisitia.

E le'i toe fa'atali Samuelu, ae ua tula'i ma ave le tama'i mamoe o lo'o susu ma fai ai le taulaga mu, ma ia alaga atu i le Atua o Isaraelu. Na fa'afogaina e le Atua le valaau atu a Samuelu, aua na te silafia mea uma. A o faia le taulaga mu ma tatalo Samuelu I le Alii, o le taimi foi lea ua latalata ane iai Filisitia. O le mea ua tupu, fai mai ona fa'afuase'i ai lea ona pa leo tele o le faititili ma ua ta'alili tele i luga o le 'au tau a Filisitia. O le malosi ma le leo tele o le faititili mai le Alii, na fa'ata'apeapeina ai ma fa'asalalauina solo ai le 'au tau a Filisitia i luma o Isaraelu.

Na omai Isaraelu uma na I Mesepa ua tuliloa, ua fasia ma ua fa'ato'ilalo Filisitia. Ina ua uma, ona avane lea e Samuelu le ma'a ma ua fa'atuina i le va o Mesepa ma Sena e fai ma ma'a fa'amanatu, na fa'aigoaina o "Epenesa" aua sa fesoasoani le Alii i a'i latou. E le gata na fa'ato'ilaloina Filisitia ma lana 'au tau, a o fanua uma na faoa e Filisitia, ua toe foi uma ia Isaraelu.

GALUEGA FA'ATINO: Taliga fesili

1. O ai na fa'apopotoina Isaraelu i Mesepa?

Tali: O Samuelu

2. O ai na fefefe ai Isaraelu?

Tali: O Filisitia

3. O le a le mea na faia e Isaraelu ina ua fa'a-mata'u mai Filisitia?

Tali: Na fai le taulaga ma tatalo i lo latou Atua e fesoasoani mai.

4. O le a le igoa o le ma'a fa'amanatu e pei ona faia e Samuelu?

Tali: O Epenesa

5. O le a le uiga o le igoa o le ma'a?

Tali: Aua sa fesoasoani le Alii.

A'OA'OGA:

1. E le tu'ulafoa'ia e le Atua i tatou o lana fanau.

2. E fa'afogaina e le Atua a tatou tatalo.

3. E fesoasoani le Atua i o tatou taimi faigata.

ASO SA MATI 26, 2023

MATAUPU 07: "SUEGA LONA LUA"

TUSI FAITAU: Mataio 25: 14-30, Numera 12: 1-16, 1Samuelu 7:7-14

SINI: Ia su'esu'eina pea mafaufau o le fanau e tusa o mataupu sa talanoaina o lenei Masina, ina ia mau ma taofi tala mai le Tusi Paia.

FESOASOANI MO FAIAOGA:

Fa'amalo atu lava mo galuega fa'atino o lenei Masina, e le faigofie foi le ala sa tatou asaina mai lea ua tau mai i le Aso Sa mulimuli, ua fa'afetai le fai o le faiva. Ae o le tatou suega, e taoto atu lava le faiga e fai ai, pau lava le soso atu, ia fa'ataunu'u ma ia saunia ni nai fa'ailoga mo le vasega. Ia manuia le tapenaga...alofa atu.

Vaega 1: Taliga fesili

1. E to'afia auauna na ave iai e le matai taleni?

Tali: E to'atolu

2. O le a se tau na maua e le auauna lelei ma fa'amaoni?

Tali: Tofia e pule i mea e tele, ulufale i le fiafia o lona Alii.

3. O le a le tau o le auauna le fa'amaoni ma paie?

Tali: Na faoa le taleni, tulia i fafo I le pouliuli le mea o lo'o iai le tau fa'itagaue ma le lilivau o nifo.

4. O le a se a'oa'oga taua na e maua mai i lea tala? (tu'u le avanoa e tali mai ai)

Vaega 11: Tali i le Sa'o po'o le Sese

1. Na muimui Miriama ma Mose i le Atua ona o le fia ta'ita'i.

Tali: Sese

2. Ina ua fa'alogu Isaraelu o le a si'i taua mai Filisitia, na lagona le fefe ma le le mautonu.

Tali: Sa'o

3. Ona tupu ai lea o le to'asa o le Alii ia te'i laua, ua Afio ese foi o ia.

Tali: Sa'o

4. Na fa'ato'ilalo e Filisitia Isaraelu ma manumalo ai.

Tali: Sese

5. O Epenesa le igoa o le ma'a fa'amanatu, o lona uiga, 'Aua sa fesoasoani le Alii'

Tali: Sa'o

Ia fa'aopoopo nisi fesili ma ia togi lelei suega a le vasega, saili se pese ma fai se tatalo e fa'auma ai le vasega. Ia manuia fuafuaga o le a feagai ai ma outou.

IA MANUIA LE ASO

SA!!

ASO SAAPERILA 02, 2023 (Aso Sa Laupama)

MATAUPU 08: "UA MALAGA IESU I IERUSALEMA"

TUSI FAITAU: Mareko 11: 1-10

SINI: Ia malamalama le vasega i le fa'amatalaga a le tusitala o Mareko i le malaga fa'atupu a Iesu i Ierusalem.

FESOASOANI MO FAIAOGA:

O le Aso Sa lenei o le Laupama, e ui lava ua masani ai tatou ona fa'amanatu i tausaga uma, ae o le fa'amatalaina o le mataupu i se isi vaa'iga e 'ese mai ai i le uiga ua tatou masani ai, talitonu o le fa'amoemoe lena ma le 'auga o aute e pei ona tauologologo atu ai pea ina ia faitaulelei ma ia lava le taimi e su'esu'e ai i le tusi faitau o lo'o fa'aogaina. Ae taoto atu lava i a outou tapenaga.

FESOASOANI MO LE MATAUPU:

O le malaga fa'a-tupu lenei a Iesu e pei ona fa'amatalaina e Mareko, ua taunu'u ai le valo'aga na valo'i'a e le Perofeta o Sakaria. (Sakaria 9:9; Ia matua fiafia o oe le tama fafine a Siona; ia alalaga fiafia o oe le tama fafine a Ierusalem; fa'auta, o le a alu atu lou Tupu ia te oe; o ia o le amiotonu ma le fa'aola; e agamalu o ia, o lo'o ti'eti'e i le Asini, o le tama'i Asini foi.)

O le malaga a Iesu i Ierusalem, na fa'ailoa ai o ia o le Tupu ma le Alii o le filemu, e pei ona pepese ma alalaga tagata 'Osana'. O le malaga fa'a-tupu foi lea a Iesu, o le amataga foi lea o lona aga atu i puapuaga o lo'o lumana'i e ala i le satauro. O le Aso Sa Laupama, o le aso e fa'amanatu ai le malaga fa'a-tupu o Iesu e 'ese mai i le tele o tupu o le lalolagi. O le tupu o lo'o ti'eti'e i le manu o le Asini, o uiga o lenei manu, e agamalu toe filemu, a'o le finagalo foi lea o le Atua na auina mai ai Iesu, ina ia maua e le lalolagi le filemu ma le loto maulalo.

O tagata ia na o latou fola le ala i laupama ma o latou ofu, ua pepese foi ma alalaga 'Osana'! Ia manuia le afio mai o le Alii. O tagata uma nei na o latou molimauina le galuega fa'aola a Iesu na faia mo latou, o le ala foi lea ua latou alalaga ai ma o latou loto talitonu ia Iesu. A'o le 'au Iutaia lava ia, o tagata ia o lo'o latou fa'atali i se tupu e sau ma le malosi e fa'ato'ilalo ai o le malo o Roma. Peita'i, e le o le finagalo lea o le Atua, o le o'o mai o Iesu i le lalolagi, na te talepeina pa vaeloto o le feitaga'i, ae ia maua le loto fa'amagalo ma le fealofani o le fanau a le Atua.

GALUEGA FA'ATINO: Fesili / Tali

1. O le a se feau o lo'o aumai e le Asini sa ti'eti'e ai Iesu?

Tali: *Filemu, agamalu, loto maulalo*

2. O le a le uiga o le upu 'Osana'?

Tali: *Ia e fa'aola mai*

3. O le malaga a Iesu i Ierusalem, o le a le uiga?

Tali: *O le malaga o le manumalo ma le filemu.*

4. Tu'u le avanoa i le vasega e fa'amatala mai ai ni o latou manatu e uiga i le Sao Sa Laupama.

A'OA'OGA:

1. O Iesu na ia aumaia le ata o le agamalu ma le loto maulalo.
2. O le loto maulalo e maua ai le filemu ma le nofo lelei.
3. Malaga fa'atasi ma Iesu e te manumalo ai i faigata e feagai ma i tatou.

PESE: Osana pepese tamaiti uma, tamaiti uma, tamaiti uma.

Osana pepese tamaiti uma, ua afio mai Iesu.
Ua latou fola laupama i le ala, laupama i le ala, laupama i le ala
Ua latou fola laupama i le ala, ua afio mai Iesu.
Ua ti'eti'e atu Ierusalem, Ierusalem, Ierusalem
Ua ti'eti'e atu Ierusalem, i luga o le Asini.

IA MANUIA LE ASO SA LAUPAMA!!

ASO SAAPERILA 09, 2023 (*Aso Sa o le Eseta*)

MATAUPU 09: "E LE O I'INEI O IA"

TUSI FAITAU: Mataio 28: 1-10

SINI: Ia malamalama tamaiti, sa manumalo Iesu i le oti ma le tu'ugamau ina ua toetu.

FESOASOANI MO FAIAOGA:

E le fa'aititia le agaga fa'afetai e tu'u atu pea e tusa ai o la outou galuega o lo'o fa'atino i Aso Sa ta'itasi, o upu a le Aposetolo o Paulo, 'E le se mea fa'a-le-aoga lo outou tautiga i le galuega ua valaauina iai outou.' O le Aso Sa foi lena e fa'amanatu ai le toetu manumalo o lo tatou Alii o Iesu mai le oti ma le tu'ugamau. Afai ua ofo atoa mai le soifua o Keriso mo tatou, ia tatau foi ona ofo atoa o tatou tagata mo ia, e ala i le fa'amaoni ona fa'atino o tatou tiute. Ia manuia le tapenaga.

FESOASOANI MO LE MATAUPU:

E ui ina iai nai ese'esega o fa'amatalaga ma fa'amaumauga a le 'au fai-Evagelia e uiga i Tina na ala usu e asi le tu'ugamau. Ae tatou te tulimata'i pea ma tatou talanoa i le fa'amatalaina e Mataio o Tina na usu i le tu'ugamau, ma maua ai se feau mo tatou. O Mataio lava ia, o lo'o ta'ua e to'alua Tina na o e asi le tu'ugamau, o Maria le makatala ma le isi Maria. O lo'o ta'ua foi e Mataio na fetaia'i Iesu ma nei Tina, na o la'ua fetagofi foi i vae o Iesu ma ifo ia te ia.

O le lulu o le mafui'e tele ina ua alu ifo le agelu a le Alii mai le lagi, o le fa'ailoga manino lena o le mamalu ma le silisili 'ese o le Atua ua fa'aalia e lona Alo o Iesu i le lalolagi. O le pupula malosai mai o le sinasina o ofu o le agelu, o le pupula mai foi lena o le malamalama o le tala lelei i Tina na o e asi le tu'ugamau. O le fefefe na o'o i Tina, ua la lagonaina le pa'i mai o le agaga o le Atua ia'i la'ua aemaise o le ola fou e ala i le toetu mai o Iesu.

O le o a Tina e asi le tu'ugamau, na la molimauina ai ua le o iai le tino oti o Iesu ae ua toetu mai, o le ata lena ua fa'ato'ilaloina e Iesu lagona o le oti, ae ua aumai le lagona o le fiafia ma le olioli, ae na amata mea ai Tina. Iesu o lo'o soifua pea ma ola fa'atasi ma o tatou tagata, ma o lo'o fa'aaau pea e o'o mai lava i o tatou foi tagata. Ia tumau lo tatou talitonu ma fa'atuatua i le Keriso toetu, e maua ai lo tatou loto tetele e galulue mo Ia ma lona finagalo.

GALUEGA FA'ATINO:

1. Ia fai sina fa'atinoga pu'upu'u o le tala o le toetu e tusa ai ma le tusi faitau ma fa'amaumauga a Mataio, ina ia maua ai pea le agaga ma le taua o le Aso Sa o le Eseta.

A'OA'OGA:

1. Ia tatou fiafia e fa'aaloa atu le tala lelei.
2. Ia manumalo pea Keriso i o tatou loto.
3. Molimau ai pea i lou olaga i aso uma.

PESE: *Le taeao segisegi le vaveao e le'i malamalama
Le tala lelei mo oe, le tala lelei mo a'u.*

**IA MANUIA TELE LE ASO SA O LE
ESETA!!**

ASO SAAPERILA 16, 2023

MATAUPU 10: “A’OA’O MA FAIA E MANUIA AI”

TUSI FAITAU: Teuteronome 6: 1-9

SINI: Ia mae'a le vasega ua malamalama le fanau o le ola a'oa'oina ma fa'atino e manuia ai.

FESOASOANI MO FAIAOGA:

Fa'afetai le fa'amalolosi malo foi le onosa'i i feau ma galuega sa fegai ai ma outou i le vaiaso. Talitonu lava le manatu o lo'o manuia mea uma e ala i le fesoasoani mai o le Agaga o le Atua ma mafutaina tatou ta'ito'atasi. O le tatou mataupu o lenei aso, A'oa'o ma faia e manuia ai, o lona uiga e le gata e taua lo tatou a'oa'o atu, ae taua foi le fai o la tatou galuega o le matua su'esu'e ma sa'ili'ili e tusa ma le tusi faitau o le mataupu e pei ona fa'amanatu atu pea e le tatou Ofisa. Ia manuia le galuega o lenei Aso Sa.

SINA FA'ASOA MO LE MATAUPU:

Na tofia e le Atua Mose na te a'oa'o ma fa'amanatu i lona nu'u le tulafono. O le feagaiga a le Atua ma Isaraelu mai lava i le tuana'i. O le tulafono, o le olataga lea o Isaraelu. Silasila foi i le tala fa'asolopito o Isaraelu. Fai mai na ola saisaitia ma nofo pologa i Aikupito. Na fai ma tavini po'o 'aauauna i tagata. Le ata o le Isaraelu ua le amanai'aina ma va'ai fa'atauva'aina e tagata ma ua leai so latou ta'u. Peita'i, o le nu'u na osifeagaiga ma le Atua, o le Isaraelu na fa'amanuia iai le Atua. O le ala foi lea na ia fa'asa'oloto mai ai mai le pule saua a Farao ma Aikupito. Na ia tu'uina foi tulafono ia Mose ina ia ta'iala ai le nu'u i le manuia.

Le tulafono lava lenei ua toe fa'amanatu mai e le tusi o Teuteronome. Le tulafono tuai mai le Esoto, lea ua toe tusia ma fa'aupuina i se gagana e talafeagai ma malamalama gofie ai le tele o le tupulaga fou lea ua sauni o le a sopoi'a le atu le nu'u folafolaina. Le tupulaga fou latou te le'i olaina le tuana'i, latou te le'i molimau foi i vavega alofa a le Atua i augatupulaga ua mavae. O le uiga foi lea o le tusi lenei o Teuteronome, o le toe fa'amanatu ma a'oa'o pea le taua o tulafono ina ia aua ne'i galo a 'ia manatua pea e le Isaraelu i taimi uma. O le manatu laualuga foi o le tusi lenei, o le tagata e usita'i ma savali i tulafono, o lona uiga e manuia. A o le tagata e le usita'i ma le savali i tulafono, o lona uiga ua galo le Atua, ma e i'u i le malaia.

Tamaiti, e 'ese le taua o lea fa'amanatu mo tatou, o le usita'i ma fa'alogi i le a'oa'o mai a Faiaoga ma Matua, o lona i'uga e manuia, a'o le e le fa'alogi ma le usita'i, o lona i'uga foi e tau i le malaia. Aua tatou te fiu e fa'alogi i le a'oa'o mai a Matua ma Faiaoga, e taua le a'oa'o so'o ma fa'amanatu pea tulafono a le Atua i o tatou olaga. Ia fai ma tatou tauloto i aso uma, a o'o foi ina feagai tatou ma faigata o le olaga, o tulafono foi e fesoasoani mo tatou.

GALUEGA FA'ATINO:

1. Ia tu'u le avanoa i le vasega e toe tusi mai ai tulafono e sefulu ma fa'atulaga mai vaega e pei ona iai tulafono.

A'OA'OGA:

1. O tulafono a le Atua e ta'iala ai oe i le manuia.
2. Ia fai pea ma au tauloto i aso uma tulafono a le Atua.
3. E manuia le tama ma le teine e fa'alogi ma usita'i i Matua.

PESE: Fa'alogi ma usita'i e leai se isi ala

E fiafia ai Iesu, pe a fa'alogi ma usita'i.

Le Atua e, fa'afetai i lou fa'aogaina pea o Faiaoga e a'oa'oina i matou ina ia matou fa'alogi ma usita'i i o matou Matua. Ia e a'oa'o mai pea ia'i matou le fanau, ma 'ia ave'ese lo matou ola le usita'i, a 'ia e foa'i mai le potu ma fa'asino pea i matou i ou ala e manuia ai...Ona o Iesu..AMENE.

IA MANUIA LE ASO SA!!

ASO SA APERILA 23, 2023

MATAUPU 11: “VAAI MA FA'ATUATUA I LE TALALELEI”

TUSI FAITAU: Galuega 13:4-12

SINI: Ia malamalama tamaiti le taua o le vaai, fa'atuatua, ma talitonu I le maliu ma le toetu o Iesu Keriso – Le Tala e lelei.

FESOASOANI MO FAIAOGA:

Malo le galulue fa'afetai le pale i tofiga ua valaauina iai lo outou soifua e galulue ai. O lo'o tatou fa'aaupu pea i tala o le toetu po'o le tala lelei e ala ia Iesu Keriso. O le mea taua, ia maua pea e le fanau le mautinoa ma le fa'amanatu pea o le uiga moni o le tala lelei e ala i le Keriso toetu. Ae le gata i lea, ia a'oa'oina pea i latou ina ia manatua pea i latou na feagai ma le tala'iina o le tala lelei i nu'u ese. Ia manuia tele le tapenaga mo le mataupu.

FESOASOANI MO LE MATAUPU:

O le tatou mataupu, o le tala i le auina atu o Paulo ma Panapa e tala'i le tala lelei o le fa'aolataga i nu'u ese. O auauna nei sa fa'ailoa iai e le Agaga Paia a'o anapogi ma tatalo, e tofia mo lana galuega tala'i. A'o le amataga foi lea o le galuega fa'amisionare a le Aposetolo o Paulo.

O Paulo ma Panapa na tofia e ta'ita'ia lotu i le Ekalesia a Anetioka, e ave le tala lelei i le itu i sisifo. Na fa'ae'e le va'a mai Selukia ma aga'i atu loa i le motu o lo'o taoto i le sami o Metitirane o Kuperu. O Salamina ma Pafu o nisi na o nu'u po'o 'a'ai o le motu o Kuperu o lo'o to'atele le faitau aofa'i o tagata Iutaia o nonofo ai. Na aga'i muamua le tala'iga i Sunako i Salamina, mo le fa'amoemoe ia fa'a-talaleleiina muamua tagata Iutaia ina ia vave ona salalau atu le tala lelei ia Iesu i tagata uma. Fa'agasolo le tala'iga i Pafu, e taunu'u atu o lo'o iai perofeta pepelo e igoa ia Paiesu. O Paiesu o ia o le Iutaia, o le taulaitu, o lo'o galue fa'a-perofeta ma taulaitu mo Sekio Paulo. O Sekio Paulo o le suikonesula, o se ofisa maualuga o le malo Roma, o lo'o avea ma Kovana o le motu Kuperu.

Na logotala le suikonesula i le galuega a Paulo ma Panapa, ma naunau ai e fia fa'alogologo i le tala lelei po'o le afiga a le Atua. Ona a'ami lea o i laua, peita'i na vavao atu e Paiesu ma tete'e atu i le tala'iga a Paulo ma Panapa. E le mana'o Paiesu e liliu le fa'atuatua o Sekio Paulo i le Alii. Aua ua iloa e Paiesu, afai ae talia ma talitonu le suikonesula i le tala lelei ia Iesu, e le toe mamao ae leai sana galuega fa'a-perofeta ma le fa'ataulaitu. Na fa'ataute'e le taulaitu o Paiesu i le tala lelei ma le finagalo o le Alii. Lea na fa'ailoa ai e Paulo o le a o'o atu ia te ia le a'ao o le Alii ona ua ia pepelo, fa'api'opi'o, tau fa'asese, ma inoino i ala tonu o le Alii. Ona tauaso ai lea o ona mata ma pogisa lana vaai. Na iloa atu e le suikonesula le mea ua tupu ia Paiesu, ona matua'i ofo ai lea o ia i a'oa'oga a le Alii. Ona fa'atuatua ai lea o ia i le tala lelei, ina ua ia vaai i vavega o le Agaga o le Atua.

GALUEGA FA'ATINO: Taliga fesili

1. O ai Paulo ma Panapa?

Tali: O Aposetolo na filifilia e ta'ita'i lotu Anetioka e tala'i le tala lelei.

2. O fea e tu ai le motu o Kuperu?

Tali: O lo'o taoto I le sami o Metitiane.

3. O ai Salamina ma Pafu?

Tali: O nu'u o le motu o Kuperu na tala'i ai Paulo ma Panapa

4. O ai Sekio Paulo?

Tali: O le suikonesula o le malo Roma

5. A'o ai la Paiesu?

Tali: O le perofeta pepelo po'o le taulaitu.

A'OA'OGA:

1. Fa'atuatua ma talitonu i le tala lelei ia Iesu Keriso.

2. Ia fai oe ma tagata tala'i o le tala lelei.

3. Ia ola i le tala lelei.

Ia fa'amanatu mataupu o le Masina e sauni ai mo le suega i le Aso Sa o lumana'i. Saili ane se pese e fetau ma le mataupu ma fa'ai'u le vasega i le tatalo.

IA MANUIA LE ASO SA!!

ASO SA APERILA 30, 2023

MATAUPU 12: "SU'EGA LONA TOLU"

TUSI FAITAU: Mareko 11;1-10, Mataio 28:1-10, Teuteronome 6: 1-9, Galuega 13: 4-12

SINI: Ia gaua'i pea loto o fanau i tala o le Tusi Paia 'ia le na'o le fa'alogo ae ia manatua pea ma ola ai i aso uma.

FESILI MA TALI:

1. O le a le aoga o tulafono ia Isaraelu?

Tali: E ta'iala ma fa'atonutonu ai le Isaraelu

2. O le a le tulafono e fa'atatau i le ava i Matua?

Tali: O le tulafono e lima

3. O le a le mau fa'a-Teuteronome?

Tali: A usita'i ma tausii tulafono e manuia, a le tausii i tulafono e malaia.

4. O le a se fa'aailoga o lo'o aumaia e le Asini?

Tali: O le filemu, agamalu ma le loto maulalo

5. O le a le uiga o le upu 'Osana'?

Tali: Ia e fa'aola mai.

6. O le a le uiga o le Aso Sa Laupama?

Tali: O le aso o le malaga fa'a-tupu a Iesu i Ierusalem.

7. Fa'amatala mai le uiga o le Aso Sa o le Eseta. (tu'u le avanoa i le vasega)

8. O ai Paulo ma Panapa?

Tali: O Aposetolo na filifilia e ta'ita'i lotu Anetioka e tala'i le tala lelei i Kuperu.

9. O a ni a'oa'oga taua na e maua mai i mataupu sa fa'amatalaina o lenei Masina?

Fa'amalo atu lava le galulue, fa'afetai foi le fa'amalolosi i la outou pitolaau o le Faiaoga Aso Sa. O le tatalo, ia maua pea lo outou malosii ma fa'amanuia le Atua. Ia saili se pese ma fai le tatalo e fa'auma ai le vasega.

ASO SA ME 07, 2023

MATAUPU 13: "FILIFILI I LE LELEI AE LE O LE LEAGA"

TUSI FAITAU: Iosua 24:14-18

SINI: Ia malamalama le fanau, o le filifili i ala o le Atua, e lelei ma manuia ai le lumana'i.

FESOASOANI MO FAIAOGA:

Malo lava le fa'amalolosi ma le onosa'i i le fa'atinoina o la outou galuega, talitonu o lo'o sologa lelei mea uma e ala i le fa'atasi mai o le agaga o le Atua e mafutaina i tatou ta'ito'atasi. O le atoaga lava o le mataupu o lo'o i le tusi faitau, o le ala foi lea o le fa'amanatu atu pea ina ia lava le taimi e faitau ai ma su'esu'e le tatou tusi faitau ua tu'uina atu. Ia manuia le tapenaga.

SINA FA'ASOA MO LE MATAUPU:

O le mataupu o lenei Aso Sa, o upu fa'amafanafana ma upu apoapoa'i a Iosua mo le nu'u o le Atua a'o le'i maliu. O Iosua na sui tulaga ia Mose ma fa'aauauina le malaga ese mai o le nu'u mai Aikupito. Lea ua taunu'u i le lau ele'ele o Kanana na folafolaina e le Atua o lo'o tafe ai le suasusu ma le meli. Ua fa'apotopotoina e Iosua itu aiga uma e 12 o Isaraelu, ma toe fa'amanatu iai le alofa lavea'i o le Atua. Le Atua na osi feagaiga ma o latou tua'a ae le'i sopoi'a ma taunu'u i le nu'u folafolaina.

Lea ua apoapoa'i Iosua 'ia aua ne'i galo le Atua na osi feagaiga ma i latou. Aua sa nonofo anamua o latou Tama i le la itu o le vaiata ma auauna atu i atua ese. O le augani lea a Iosua i le tupulaga fou o Isaraelu, 'ia matata'u i le Alii, ma auauna ia te ia ma le fa'amaoni'. O le fa'amalosi mo le nu'u ina ia usita'i ma fa'alogu, ma 'ia fa'atino atoatoa le tautua mo le Atua. Le Atua na osi feagaiga ma auga-Tama i le amataga ina ua fa'a-sa'oloto mai i latou mai le pologa i Aikupito. O le Atua foi na molimauina e Iosua ana vavega ma fa'aailoga tetele sa fai, na fa'asaoina mai ai Isaraelu i le faigata o le ala na o latou savalia mai.

Le alofa lavea'i lena o le Atua na saogalemu ma taunu'u manuia ai Isaraelu i le nu'u folafolaina. O le fa'amalosi 'au la a Iosua, ina ne'i galo ia Isaraelu le Atua. Afai e leaga ia'i latou ona auauna atu i le Atua soifua, ina filifili ia po'o atua o nu'u ese latou te fia auauna ai, po'o le Atua soifua e to'atasi. O le augani a Iosua ia Isaraelu, ia latou filifili fa'atasi ma le Atua i taimi uma, aua ne'i masalosalo pe fa'a-luafesasi o latou mafaufau a ia tumau ona manuia lea o latou olaga. O le taimi e fa'agalo ai e le tagata le Atua ae fa'alagolago i lona malosi ma lona poto, o le taimi foi lena e liliu mai ai le Alii i lona to'asa.

GALUEGA FA'ATINO: Tusigatala

1. Ia tu'u le avanoa i le vasega e tusi mai ai, ia le silia ma le laupepa e tasi, ia fa'amatala mai lava lona olaga po'o le a le mea o lo'o filifili iai mo lona lumana'i, ae po'o le a foi ni fa'afitauli na sasi pe na sese ai lana filifiliga po'o le a lava le taimi na tupu ai.

A'OA'OGA:

1. Ia filifili i ala o le Atua e manuia ai.
2. Fa'alogu ma usita'i e fa'aeaina ai i mea lelei.
3. Fa'avae ma tumau lou ola i le Alii.

PESE: Ua ou filifili, e mulimuli ia Iesu (x2)

Ou te le toe foi, ou te le toe foi
Satauro i ou luma, le lalolagi i ou tua
Ou te le toe foi, ou te le toe foi.

ASO SA ME 14, 2023 (ASO SA O TINA)

MATAUPU 14: "E VIIA LE TINA AMIO LELEI"

TUSI FAITAU: Fa'ataoto 31:10-12; 26-31

SINI: Ia mae'a le vasega ua malamalama le fanau, o le Tina amio lelei e mata'u i le Alii, ma e viia foi o ia e tagata.

FESOASOANI MO FAIAOGA:

Talu ai o le Aso Sa lena o Tina, e momoli atu ai fa'amanuiaga i le Tina o le galuega fa'apea Tina uma o le Ekalesia aemaise lava i Tina ua ofoina lo latou soifua i le galuega fa'a-faiaoga Aso Sa. Ua fa'amalo le fai o le faiva e ala i le fa'atinoina o la outou pitolaau fa'a-Tina i lea aso ma lea aso. Ia maua pea lo outou malosi mai le Atua ma ia manuia tele lo outou aso Fa'apitoa. Ia manuia foi lau tapenaga mo le mataupu.

FESOASOANI MO LE MATAUPU:

E tele tusitusiga ma fa'amaumauga a le Fa'ataoto o lo'o fa'atatau ma fa'asino tonu i Tina. O le fa'alagiina o Tina Samoa, o latou o pae ma 'auli i totonu o so'o se fa'alapotopotoga. Lea foi o lo'o atagia lea tulaga i fa'amatalaga a le tusi o Fa'ataoto. I le fa'ai'uga o le tusi, o lo'o aumai ai le ata o le Tina e malosi lona tagata, e maoa'e lona poto, e tele agava'a ma taleni, ma o ia o se Tina alofa. E tele nisi ua latou manatu o Tina o le Tusi Paia e maulalo pe vaivai foi; e leai ni o latou tulaga, o auauna po'o tavini, e sauaina ma taotaomia o latou lagona. Peita'i, e le o fa'apea le vaai a le tusi o Fa'ataoto, fai mai le fuaiupu e 10-12, "O le Tina amio lelei, e sili lona tau i penina; e fa'atuatua iai le loto o lana tane; e le mativa i oloa; e agalelei i aso uma."

I le fuaiupu e 26-31, O lo'o aumai ai le ata o le Tina e maoa'e le tomali ma agava'a fa'apitoa o lo'o ia

te ia. O le fa'atusa o se tagata taualoa ma maualuga se tulaga i totonu o se fa'alapotopotoga, aiga, ma nu'u. E mafai ona avea le tomai ma agava'a o se tagata, ma fa'ailoga o se tagata e lelei le amio. Ae peita'i o le matagofie ma le lalelei, o mea ia e fa'atauva'a. A'o le Tina e mata'u ma ava i le Alii, e viia lava o ia. O tomai ma agava'a uma nei, e o fa'atasi ma le mata'u i le Alii, ona viia lea o ia. Aua o le Atua e ona le ola, malosi ma le potou uma lava e ao ona matua viia o Ia e tagata uma.

GALUEGA FA'ATINO: Tusigasolo

1. Ia tu'u le avanoa i le vasega e tusi mai ai a latou solo e fa'aulutala, 'O le Tina'. A mae'a ona fa'asolo lea i luga e faitau a latou solo, ae togi e faiaoga. Manaia foi ae iai ni solo se lua pe tasi foi e faitau pe a potopoto fa'atasi le aoga Aso Sa e fa'auma.

A'OA'OGA:

1. O le mata'u i le Atua o le amataga lea o mea lelei uma.
2. O le Atua e maua ai le malosi ma le potou.
3. Aua ne'i galo ona fa'afetai i le Atua fa'apea matua.

PESE: O se Tina amio lelei, e sili i penina

E silisili o ia i ma'a taua

Ua fa'apena o oe Tina, i o matou nei agaga

Ua fai o ia ma malamalama i le pogisa.

MANUIA LE ASO SA O TINA!!

ASO SA ME 21, 2023

MATAUPU 15: "E SILI LE TAULAGA PE SILI LE ALOFA"

TUSI FAITAU: Mataio 9:9-13

SINI: Ia malamalama le fanau i le uiga o le taulaga ma le alofa o le Atua i le tagata.

FESOASOANI MO FAIAOGA:

Malo lava le onosa'i i feau ma galuega sa feagai ai ma outou o le vaiaso. Fa'afetai foi le galulue e tusa o la outou pito laau o le faiaoga Aso Sa. E taua le toe fa'amanatu o mataupu o le Masina e sauni ai mo le suega o le Aso Sa o muamua. Ia saili foi le taimi e faitau ai le tusi faitau ua fa'atulaga atu mo le mataupu, ina ia lava tapena ai le fa'amatalaina. Ia manuia le galuega.

SINA FA'ASOA MO LE MATAUPU:

O le tatou mataupu o leni aso, o le fa'aaliga na faia e Iesu e ala i ana fa'amalologa ma vavega i totonu o lona lava nu'u o Kapanauami. A'o fa'agasolo le galuega fa'amalolo a le Alii o Iesu, o lo'o fa'apena foi ona taumulimuli ai ma le 'au tusiupu ma le 'au faresaio po'o ta'ita'i lotu Iutaia. O le 'au tusiupu ma le 'au faresaio, o i latou nei e tausia ma fa'amalosia tulafono a le Atua, o tu ma aga fa'a-Iutaia. Fai mai a'o fa'amalolo e Iesu le ma'i supa ma fetalai ane ai, "ia e lototele, ua fa'amagaloina au agasala". A o fa'alogologo ane le 'au tusiupu ma latou fa'apea ifo ai, o lo'o faifai Iesu i le Atua. Aua o le talitonuga a le 'au tusiupu, ua na'o le Atua na te fa'amagaloina agasala a tagata.

Ua silafia e Iesu manatunatuga a le 'au tusiupu, lea na ia fetalai atu ai, "po'o le fea e faigofie, po'o le fai atu ua fa'amagaloina au agasala, po'o le fai atu ina tula'i ma savali?" O le ala lena na fetalai ane ai Iesu, tula'i ma ave lou moega ma alu i lou fale. O lo'o fa'amatalaina i'ina o Ia o le atali'i o le tagata, ua ia te ia le pule e fa'amalolo ma fa'amagalo ai le tagata agasala. Ua faia e Iesu le vavega i le tagata ma'i supa, e fa'ailoa atu ai, e sili galuega nai lo'o upu ma tala.

O le tala i leni taeao, fai mai ona maliu ese lea o Iesu mai lana fa'amalologa o le ma'i supa, ona iloa atu lea o Mataio le ao lafoga o lo'o nofo i le fale e ao ai lafoga. O Mataio o le ao lafoga na filifilia e le malo Roma e galue i lea 'a'ai. Na silafia lelei e Iesu le fa'aletonu o Mataio i le fa'atinoina o lana galuega. Peita'i, lea ua valaauina e Iesu e fai ma ona so'o. E le'i popole Mataio i lana galuega, na tu'u ae mulimuli ia Iesu. Ua iloa atu e le 'au faresaio o lo'o a'ai fa'atasi Iesu ma le to'atele o le 'au ao lafoga, ona tu'u fesili lea pe aisea ua 'a'ai fa'atasi ai o Ia ma tagata agasala. Na tali Iesu, 'e le aoga le foma'i i e malolo, na o e mama'i'.

Silafia e Iesu le ola fia amiotonu o le 'au tusiupu ma le 'au faresaio, aua e leai se aoga e faitaulaga ai i le Atua, ae leai se alofa i le o lo'o vaivai. E le aoga le taulagi ma ta'uta'u le silisili ese o le Atua, pe afai e te le alofa ma fa'amagalo i lou uso.

GALUEGA FA'ATINO: Fesili fa'atupu manatu

1. O le a le ma'i na maua ai le tagata lea sa fa'amaloloina e Iesu?

Tali : *O le ma'i supa*

2. O ai le igoa o le ao lafoga?

Tali : *O Mataio*

3. O ai tagata ia o lo'o fa'alavelave i le galuega fa'aola a Iesu?

Tali : *O le 'au faresaio ma le 'au tusiupu*

A'OA'OGA:

1. Aua le ola fa'a-fiaamiotonu

2. Ia e alofa muamua i lou uso, ona e faitaulaga ai lea i le Atua.

3. E le fa'atuaia le alofa o le Atua.

Fa'afetai mo le galuega o lenei Aso Sa, ia saili se pese ma fai se tatalo e fa'auma ai le vasega.

ASO SA ME 28, 2023 (Aso Sa Penetekoso)

MATAUPU 16: "O ISEU LE ALA I LE TAMA"

TUSI FAITAU: Ioane 14:1-17

SINI: Ia malamalama tamaiti o le fa'alagolago i le ta'ita'iga a le Agaga Paia, e sa'o ai le ala e savali le tagata.

FESOASOANI MO FAIAOGA:

Malo le onosa'i fa'afetai le fa'atoatoa i le galue ua valaauina iai outou, manatu o lo'o manuia mea uma aemaise o le fa'agasologa o fuafuaga e pei ona masani ai. Talu ai o le Aso Sa lenei o le Penetekoso, ua leai ai se tatou suega fa'amanatu e pei ona masani ai, ae ao lava ona talanoaina le mataupu o le Aso Sa Penetekoso ona o se aso fa'apitoa taua e tusa ai o le tatou Kalena. Ia manuia tele le tapenaga.

SINA FESOASOANI MO LE MATAUPU:

O le iai o Iesu i le lalolagi i lana galuega fa'aola e le'i faigofie. Aua o le galuega e tumu i faigata ma fa'afitauli. Na i'u ma tualuga lana galuega ina ua fasiotia ma maliu ai. Ae na fa'aalia le mana o le Atua ina ua le mafai e le oti ona taofia lona toetu manumalo, ma na ia fa'ato'ilaloina ai le oti.

O le aso Penetekoso, ua fa'ailogaina e le 'au Kerisiano, o le lima sefulu aso talu ona toetu mai Iesu. Na ia folafola ai i le au so'o e alu i le lagi ae auina mai lona lava Agaga Paia e fesoasoani i a'i latou. O le aso Penetekoso, o le afio ifo o le Agaga Paia i luga o le 'au so'o, ma maua ai e i latou le malosi fa'a-le-agaga e fai ai le galuega tala'i.

O tala fa'amaumau a Ioane e uiga i le galuega tala'i a le Alii. O upu fa'amafanafana a le Alii i ona lava tagata, aua e le o toe umi ona tu'ua lea e Ia o le mafutaga. Ua folafola i lona 'au so'o, le nofoaga e nonofo ai i le maota o lona Tama. O lona uiga, latou te le mau fa'atasi pea i le tino, ae ua saunia e Iesu le nofoaga mo i latou i le lagi e fa'avavau.

Manino lava le fa'amanatu mai o le tusi faitau a Ioane mo tatou, o Iesu o le ala, upu moni ma le ola. O lona uiga, a le talia e le tagata Iesu ma fa'atuatua e ala i lona maliu ma lona toetu mai, e le mafai lava ona maua le nofoaga e pei ona ta'ua ua saunia e le Atua. O le tagata foi e fa'alagolago lana savaliga i le mana o le Agaga Paia, e mautino foi le taunu'uga manuia e taunu'u iai.

GALUEGA FA'ATINO: Upu ma o latou uiga

1. Penetekoso - o le afio ifo o le Agaga Paia
2. Maota - fale
3. ele'ele - palapala
4. Agaga Paia - Agaga o le Atua
5. folafola - ta'u atu

A'OA'OGA:

1. O Iesu o lo tatou ala i malo.
2. Tumau lo tatou talitonu ma fa'atuatua ia Iesu le Alii toetu.
3. Fa'amoemoe i le Agaga Paia e manuia ai o tatou ala uma.

PESE: Sau ta o ma a'u, i le, i le maota (x2)

O lo'u, o lo'u Tama

Sau ta o ma a'u, i le, i le maota

O iai le fiafia, fiafia, o iai le fiafia.

IA MANUIA LE ASO SA PENETEKOSO!!

ASO SA IUNI 04, 2023

MATAUPU 17: "UA TE'ENA E LE ALII LE ALA O PALA'AMO"

TUSI FAITAU: Numera 22:15-35

SINI: Ia iloa e le fanau, o tatou ala e le o ala ia o le Alii, ia fa'alogo pea i le fa'asinoga a le Alii i ala e tataua ona tatou savavali ai.

FESOASOANI MO FAIAOGA:

Fa'amalo atu lava le fa'amalolosi e tusa ai o galuega o lo'o gafa ma outou, fa'afetai atu foi le onosa'i e tusa o lo outou valaauina. O le fa'amoemoe maua lava, o le tatou galulue fa'atasi e faigofie ai la tatou galuega. E fa'amolemole atu pea ia fa'ato'aga ona faitau ma su'esu'e le tatou tusi faitau ua tu'uina atu. Ia manuia le tapenaga o le mataupu.

FESOASOANI MO LE MATAUPU:

O le tusi faitau e pei ona aumai ai le tatou mataupu o lenei taeao, o le tala e uiga ia Palako le tupu o Moapi, ma Pala'amo le tagata o le Atua. O le fa'ato'ilaloina e Isaraelu o sa Amori ma fa'asolo ane ai lava i le fanua laugatasi o Moapi ua tolauapi ma nonofo ai.

Ua lemautonu le tupu o Moapi ona o le nu'u e matua to'atele naua. E le faigofie ia te ia ona fa'ato'ilaloina le nu'u. Na ia tapa se finagalo po'o se fesoasoani a le tagata o le Atua, na ia poloa'iga ina maliu mai na te fetu'u ia Isaraelu. Na alu le savali a Palako, ae le'i taliaina e pala'amo. Na toe alu fa'alua le savali ia Pala'amo, ma i'u ai lava ina manatu Pala'amo o le a alu ifo ia Palako.

Na fa'aailoa i le ala e le agelu, e le finagalo le Atua i le mea o le a faia e Pala'amo. Na fa'aailoa iai e le Atua le sese o le mea o le a ia faia. Na fa'a-gaganaina e le Atua le Asini ina ua sasa fa'atolu e Pala'amo. E le ala o le Alii, lea ua manatu iai Pala'amo na mafua ai ona alu se'i tali le mana'o o Palako. O le mana'o se'i alu atu Pala'amo e fetu'u ia Isaraelu, ae fai mo latou le lau'ele'ele. Ua uma taumafaiga a le tupu o Palako, e le'i mafai ona tupu le mea na ia mana'o iai. O le mea ia tatou iloa, po'o a lava taumafaiga a le tagata i le mea e mana'o iai, ae a le finagalo iai le Atua, e le mafai lava ona tupu. E le mafai foi e so'o se tupu ona fetu'u le nu'u o le Atua.

GALUEGA FA'ATINO: Fesili fa'atupu manatu

1. O ai le igoa o le tupu o Moapi?

Tali: O Palako

2. O ai le igoa o le tagata o le Atua o lo'o ta'ua i le tala?

Tali: O Pala'amo

3. O le a le mea na mana'o iai Palako ina ia faia e Pala'amo?

Tali: E fetu'u ia Isaraelu ae fai mo latou le lau'ele'ele.

A'OA'OGA:

1. E silafia e le Atua mea uma.
2. O ala o le tagata, e le o ala ia o le Atua.
3. E le i'u lelei le tagata faufau leaga.

Malo lava mo le galuega o lenei Aso Sa, ia saili ane se pese ma fa'ai'u le vasega i le tatalo.

IA MANUIA LE ASO SA!!

ASO SA IUNI 11, 2023

MATAUPU 18: "O LE PEPELO O ANANIA MA SAFAIRA"

TUSI FAITAU: Galuega 5:1-11

SINI: Ia malamalama tamaiti e le fiafia le Alii i le tagata ae ola pepelo.

FESOASOANI MO FAIAOGA:

Malo le onosa'i fa'afetai le galulue, manatu o lo'o lelei mea uma, ae fa'amanatu atu pea ia fa'ato'aga le faiga o lau sa'iliga mo le tusi faitau. Ia manuia tele le tapenaina o le mataupu.

SINA FA'ASOA MO LE MATAUPU:

O Anania ma Safaira, o se ulugalii i le taimi o le ulua'i Ekalesia. O i laua uma e nonofo i Ierusalem. O le vaitau lea sa tele ai o latou fanua ma fale, fa'atasi ma nisi tagata. O le to'atele o isi tagata ua o latou fa'atau atu o latou fanua ma fale, ona maua mai lea o tupe ma tu'uina atu i le 'au Aposetolo, aua le atina'eina o le Ekalesia Kerisiano po'o le lotu. Sa iai foi la le fanua o Anania ma Safaira, na o la'ua fa'atau atu. O le mea ua tupu, ua maua mai le tupe, ma ua le ave uma e tusa o le ta'utinoga ua uma ona fai, i le ave uma lea o le tupe e maua, aua le atina'eina o le Ekalesia. Ua ave le isi vaega o le tupe, ae ua tu'u ia'i la'ua le isi vaega tupe.

O le itu sa sili ona lelei, o le pepelo o Anania, mulimuli ane ua sau foi lana ava o Safaira, ua fa'apena foi ona pepelo o ia. Sa fesili muamua Peteru i le tamaloa o Anania, ae pepelo. Ona oti ai lea o ia. Ua mavae atu nai itula e tolu talu ona maliu Anania ae sau lona to'alua o Safaira, toe fesili atu iai Peteru ae pepelo foi, ma i'u ai ina oti ai foi ma ia. E mafai ona fa'amatala Anania ma Safaira, o se ulugali'i ua fa'alogu ma iloa le tala lelei, a'o le lotu ma le fa'atinoga, e le o atoatoa. Ua pepelo i luma o tagata, ae sili ai le silafaga a le Atua. E to'atele tagata e fa'apena i le olaga nei. E fiafia e pepelo, ma le manatu e fa'asaoina ai, a'o nisi foi o tagata, ua pepelo lava ma le iloa.

E to'atele lava tamaiti e fa'apea o latou uiga. Ae ua a'oa'o mai lenei mataupu, i le lelei o lea amioga ona tatou faia. E mo'omia le ta'utino ma fa'atino. Po'o le folafola ma taumafai ina ia taunu'u, ae aua le ola pepelo e le fiafia ai le Atua.

GALUEGA FA'ATINO: Taliga fesili

1. O ai Anania ma Safaira?

Tali: O le ulugalii sa pepelo i le Atua.

2. O le a le pepelo a le ulugalii sa fai?

Tali: Ua la le ave uma le tupe e tusa ma le la ta'utinoga sa fai e ave uma le tupe.

3. Se mea lelei le ola pepelo?

Tali: Leai, e le lelei le ola pepelo.

A'OA'OGA:

1. E leaga le ola pepelo i matua.
2. Aua le mana'o tele i le tupe.
3. Ia tatou mafaufau loloto i a tatou ta'utinoga.

Fa'afetai tele mo le galuega sa feagai ai ma outou i lenei Aso Sa, ia saili ane se pese e fetau ma le

mataupu ma tofi se tama e fa'ai'u le vasega i le tatalo.

IA MANUIA TELE LE ASO SA!!

ASO SA IUNI 18, 2023 (Aso Sa o Tama)

MATAUPU: “O ALA O LE TAMA FAI AIGA LELEI”

TUSI FAITAU: Kenese 13: 1-18

SINI: Ia malamalama tamaiti, po'o a uiga o le Tama lelei o lo'o aumai e le tala ia Aperaaamo ma Lota ma o la auauna.

FESOASOANI MO FAIAOGA:

Talu ai o le Aso Sa lenei o Tama, matou te fa'amanuia atu ai le Aso Sa o Tama i le Tama o le galuega fa'apea Tama uma o le Ekalesia, aemaise o Tama o lo'o i le li'o o Faiaoga Aso Sa. Malo le galulue fa'afetai fai o le faiva, ia fa'amanuia pea le Atua e tusa o lo outou valaauina i lana galuega. Ia faitau manino le tusi faitau ona faigofie lea o le fa'amatalaina o le mataupu. Ia manuia le tapenaga.

FESOASOANI MO LE MATAUPU:

O le mataupu o lenei Aso Sa, o le tala ia Aperaaamo ma le atali'i o lona uso o Lota. Ina ua foi ane Aperaaamo nai Aikupito, sa mau fa'atasi o ia ma Lota fa'atasi ma mea uma sa ia'i la'ua. O ni tagata maumea i la'ua, aua e iai a la lafu mamoe ma povi fa'apea ma ario. Na o 'ese mai Aikupito ma taunu'u atu i Peteli. O Peteli foi sa fa'amatu ma malolo ai Aperaaamo ma Sarai a'o aga'i i Aikupito. O Peteli foi na mua'i fa'atuina ai e Aperaaamo le fata faitaulaga mo le Atua. Aua e talitonu ma fa'atuatua Aperaaamo, so'o se mea e alu iai, e fa'atasi ma auai le Atua ma ia. O le uiga o le igoa Peteli, “Fale o le Atua”.

I lea vaitau, o Aperaaamo o le tagata e mau'oa ma tele le tamaoaiga aua e fai ana lafu mamoe ma lafu povi. E aoga tele mamoe ma povi e fai ai mea'ai, o ofu, o fale 'ie ma fai ai taulaga. Ua avea le tele o tamaoaiga nei ma ala ua tupu ai le fa'aletonu i le mafutaga a Aperaaamo ma Lota. E le'i faigofie le nonofo fa'atasi o Aperaaamo ma Lota, aua ua vaaia le femisaa'i o a la auauna.

Ua tonu i le manatu o Aperaaamo e le tatau ona o latou toe nonofo fa'atasi, aua e le o lelei le va o a la auauna ma Lota. Lea na fa'apea ane ai Aperaaamo ia Lota, 'ia aua ne'i o la femisaa'i, fa'apea foi o la auauna, a 'ia tausi le filemu ma le nonofo lelei. Ua tu'u e Aperaaamo le avanoa ia Lota e filifili ai se lau'ele'ele o lumana'i mo ia. Afai e fia alu i le itu taumatau, o le a ia alu i le itu tauagavale, ae afai e fia alu i le itu tauagavale, o le a ia alu i le itu taumatau. O le tu'u avanoa ma le fa'amuamua a le Tama e tausisi i le filemu ma le nofo lelei o aiga. O se Tama e loloto lana tofa ma mamao lana silasila i mea e manuia ai aiga.

Ua va'ava'ai Lota i le matagofie, lafulemu, ma le laugatasi o Ioritana, ma ia filifili ai mo ia. Na fa'atuina lona fale 'ie e lata ane i Sotoma. A'o Aperaaamo, na mau o ia i Kanana, le nu'u lea na folafolaina atu iai e le Atua, o le a fai mo ia ma lana fanau e fa'avavau.

GALUEGA FA'ATINO:

1. O le a le uiga o le igoa 'Peteli'?

Tali: *Fale o le Atua*

2. O le a se feau e fa'atatau mo Tama o lo'o ta'ua i le tala?

Tali: *O le fa'ata'ita'iga o lo'o aumai e Aperaaamo, o le Tama e lelei ana fa'ai'uga fai mo le nonofo filemu ma le manuia o aiga.*

3. O le a se mea na iloa ai o le tagata mau'oa ma tamaoaiga Aperaaamo i lea vaitau?

Tali: *O le tagata e fai ana lafu mamoe ma lafu povi.*

A'OA'OGA:

1. Ia sa'o au fa'ai'uga fai.

2. Ia avea oe ma tagata e fa'atuina le filemu ma le nofo lelei i lou aiga.

3. Ia usiusita'i ma alolofa i matua.

PESE: Tama! Tama po'o ua e sauni ea (x2)
I lou aso taua.

IA MANUIA TELE LE ASO SA O TAMA!!

ASO SA IUNI 25, 2023

MATAUPU: “SUEGA FA'AI'U O LE AFA MUAMUA”

SINI: Ia su'esu'eina pea mafaufau o le fanau ina ia mau pea ma teufatu tala o le Tusi Paia o lo'o a'oa'oina ai i mataupu ta'itasi.

FESOASOANI MO FAIAOGA:

Ua tatou taunu'u mai i siu'i o le tatou galuega fa'atino o le afa muamua o lenei tausaga, malo le fa'atoatoa fa'afetai foi le galulue aua o outou faiva alofilima fa'a-faiaoga Aso Sa. O le upu moni, e le faigofie la outou galuega, ae ona o le moni o lo outou soifua ofoina mo le feau ma le galuega a le Atua. Ua outou masani i a tatou suega fa'ai'u, o la outou faitalia e fa'atino ai le suega, ae ua na'o le ata o lo'o tu'uina atu i le tatou tusi. Ma tautuana ia saunia ni nai fa'ailoga mo le vasega, fai atu ai foi, o outou lava o lo'o iai le tele o metotia e fa'aosofia ai pea fanau e omai i le Aoga Aso Sa. Ia manuia le tapenaga mo le suega.

VAEGA 1: Fesili ma Tali

1. E to'a fia auauna na ave iai e le matai taleni?

Tali: *E to'atolu*

2. O se mea lelei le paie?

Tali: *E leai*

3. O fea na fa'apotopotoina ai e Samuelu tagata o Isaraelu?

Tali: *O Mesepa*

4. O le a le uiga o le igoa o le ma'a fa'amanatu “Epenesa” e pei ona ta'ua?

Tali: *Aua sa fesoasoani le Alii*

5. Aisea na fai ai tulafono e le Atua?

Tali: Na fai e ta'iala ai Isaraelu.

6. O le a le uiga o le upu 'Osana'?

Tali: *Ia e fa'aola mai.*

7. O ai le igoa o le suikonesula o le malo Roma?

Tali: *O Sekio Paulo*

VAEGA 11: Tali i le Sa'o po'o le Sese

1. O Paulo ma Panapa e le'o ni aposetolo filifilia.

Tali: *Sese*

2. O le Penetekoso, o lona uiga o le afio ifo o le Agaga Paia.

Tali: *Sa'o*

3. O Palako le igoa o le tupu o Moapi.

Tali: *Sa'o*

4. O Palaamo le tupu o Isaraelu.

Tali: *Sese*

5. O le uiga o le igoa Peteli o le 'Fale o le Atua'

Tali: *Sa'o*

VAEGA 111:

1. Tu'u le avanoa i le vasega e toe fa'amatala mai ai po'o a ni a'oa'oga taua o latou manatua i mataupu ta'itasi sa fa'amatalaina i Aso Sa ua tuana'i.

**IA MANUIA TELE LE MALOLOGA O LE A FEAGAI AI I LE AFA MUAMUA O LENEI
TAUSAGA IA IULAI 02, 2023 ----- IULAI 30, 2023.**

FA'ASOLOGA O MATAUPU VASEGA FEOLOLO

<u>ASO</u>	<u>MATAUPU</u>	<u>TUSI FAITAU</u>
1. Fepuari 05, 2023	Ia pipi'i i le Alii	Iakopo 1:12-15
2. Fepuari 12, 2023	O le avea ma ta'ita'i lelei	1Peteru 5:1-11
3. Fepuari 19, 2023	O le poloaiga a Iesu	Mataio 28:16-20
4. Fepuari 26, 2023	SUEGA MUAMUA	
5. Mati 05, 2023	Fa'amaoni i le aoga e te manuia ai	Mataio 25:14-30
6. Mati 12, 2023	O Mose le auauna fa'amaoni	Numera 12:1-16
7. Mati 19, 2023	E fesoasoani mai le Alii ia'i tatou	1Samuelu 7:7-14
8. Mati 26, 2023	SUEGA LONA LUA	
9. Aperila 02, 2023	Ua malaga Iesu i Ierusalem (Aso Sa Laupama)	Mareko 11;1-10
10. Aperila 09, 2023	E le o i'inei o Ia (Aso Sa o le Eseta)	Mataio 28:1-10
11. Aperila 16, 2023 6:1-9	A'oa'o ma faia e manuia ai	Teuteronomie
12. Aperila 23, 2023	Vaai ma fa'atuatua i le talalelei	Galuega 13:4-12
13. Aperila 30, 2023	SUEGA LONA TOLU	
14. Me 07, 2023	Filifili I le lelei ae le o le leaga (Aso Sa o Tina)	Iosua 24:14-18
15. Me 14, 2023 31	E viia le Tina amio lelei	Fa'ataoto 31:10-12, 26-
16. Me 21, 2023	E sili le taulaga pe sili le alofa	Mataio 9:9-13
17. Me 28, 2023	(Penetekoso) O Iesu le ala i le Tama	Ioane 14:1-17
18. Iuni 04, 2023 35	Ua te'ena e le Alii le ala o Pala'amo	Numera 22:15-
19. Iuni 11, 2023	O le pepelo o Anania ma Safaira	Galuega 5:1-

20. Iuni 18, 2023
18

O ala o le Tama fai aiga lelei

Kenese 13:1-

21. Iuni 25, 2023

(Aso Sa o Tama)
SUEGA MULIMULI O LE AFA TAUSAGA

MANUIA TELE LE TU'UAGA, TATOUE TOE FEILOA'I!!



Tautua Printing Press
Congregational Christian Church of American Samoa
1 Kanana Fou Street, Box 1537
Pago Pago, American Samoa 96799
www.efkasonline.org

